

**Date – 14/03/2026**

**Time - 7:30 -7:40 Hrs**

**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

1. Lunglei Civil Hospital-a nau pai inentir tura kal Pi F.Lallawmkimi kum 31 Zobawk Venghlun ami chu nimin khan damdawiin bul thingpui dawr inthiarna bulah nau a cheh a, hemi tlai hian Pi F Lallawmkimi hi private damdawiinah a thi.
2. Saitual Deputy Commissioner Pu Srinivas Sadi an nimina Saitual khelmuala Chapchar Kut lawmna-a Mizo tawnga thu a sawi chuan lawm a hlawh hle.
3. Prime Minister Narendra Modia chaun nimin khan Assamah hmasawna project cheng vaibelche sing 2 leh sang 4 chuang hu a hawng a, PM-KISAN Scheme dawngtu loneitu vaibelchhe sang 9 te hnenah installment vawi 22 na a pechhuak bawk
4. Lok Sabha chuan Supplementary Demands for Grants- Second Batch 2025-26 a pawm.

<><><>

**MATERNITY DEATH**

Lunglei Civil Hospital-a nau pai inentir tura kal Pi F.Lallawmkimi kum 31 Zobawk Venghlun ami chu nimin khan damdawiin bul thingpui dawr inthiarna bulah nau a cheh a, hemi tlai hian Pi F Lallawmkimi hi private damdawiinah a thi.

Kan corr thudawn danin, Pi F. Lallawmkimi hi nimin khan Civil Hospital Lunglei OPD a inentir a kal chu a ke a vun avangin Cardiology lamah tirh a ni a, Doctor a awm loh avang a inentir lovin an chhuak a, khawlaiah ke a kal in thil leitur zawng in an vak kual a, Police Thana bula thingpui dawrah chawl in hetihlai hian inthiar a duhthu a sawi a, kawmkar deuhah inthiar in hetah hian nau hi a sang chhuak ta a ni.

Nau a san chhuah hnuah Civil Hospital dawr nghal a ni a, anni hian khum ruak an neih loh thu in an lo chhang a, a vel a lo awm te nen tangrualin lirthei remchang hmangin John Williams Hospital an pan nghal a, hetah hian hmeichhe Doctor a lo awm lova, Civil Hospital bawk panpui leh niin Civil Hospital an thlen hnu lawkah a thi zui ta a, a thihchhanah Sudden Cardiac Arrest tih a ni a ni.

Thudawn danin Pi F. Lallawmkimi naute erawh a tha a, tunah hian NICU-ah dah nghal a ni a, a dinhmun a tha ni a sawi a ni.

<><><>

## CHAPCHAR KUT

Mizote Kut pui ber leh ngaihhlut ber Chapchar Kut lawmna chu nimin khan ‘Zonun ze mawi – Inremna’ tih thupui hmangin Mizoram hmun hrang hrangah hman a ni.

Chapchar Kut lawmna pui ber Aizawl Lammual ah chuan kut ngaihlu lawm tura kal mipui an thahnem hle a, khua in bumro mahse boruak erawh a zangkhain an hlim hle a ni.

Aizawl District ah chuan Chief Minister Pu Lalduhoma chuan Kut Pa niin a Chapchar Kut lawmna pui ber Lammual ah a hmanpui a, mi tin inremna a pawimawh tih sawiin mawhpurhna la ngam ni theuh turin kalkhawmte a sawm a ni.

Lunglei District ah chuan C. Thuamluaia Mualah Chapchar Kut hi hman a ni a, Lunglei High Powered Committee (HPC) Vice Chairman Pu V. Malsawmtluanga chuan Kut Pa niin a hmanpui a, Chapchar Kut chu inrem, hlim leh lungual taka khawtlang mipui zawng zawngin an hman ho thin a nih angin, a awmze ril tak ngaihtuah chungah hlim taka hmang turin mipuite a sawm a ni.

Siaha District ah chuan Vaihipi Field ah hun hman a ni a, Siaha DC leh Kut Pa ni bawk Pu VL. Hruaizela Khiangte chuan Chapchar Kût chu inremna ni anih angin ram leh hnam siamthat hna thawk chhonzawm thei tûrin thlamuang takin rilru sen a pawimawh thu a sawi.

Champhai District ah chuan Adviser to Chief Minister Pu TBC Lalvenchhunga'n a hmanpui a, Zonun ze mawi inremna tih thupui chu Mizo hnam nena inrem tak ani tih sawiin hemi vawng nung reng turin kalkhawmte a chah a ni.

Kolasib District ah chuan Deputy Speaker Pu Lalfamkima chuan Kut Pa niin a hmanpui a, Hnam inpumkhatna aia politics-ah nchirthehna a hluar ta lutuk chu pawitih thu sawiin inpumkhat leh zual tura tan lak a pawimawh thu a sawi a ni.

Serchhip District ah chuan Leisekawt Mualah Chapchar Kut hi hman a ni a, Kut Pa RD Minister Prof Lalnilawma chuan Chapchar Kut chu zonun zemawi chawisanna anih angin thangthar lo awm zel tur te hnenah Mizo hnam zia pawimawhna leh hlutna chawi lar a pawimawh thu a sawi a ni.

Lawngtlai District ah chuan Chapchar Kut hi DC pisa tualah hman a ni a, Kut Pa Home Minister Pu K. Sapdanga chuan ram politics siam tha turin mi tinin mawhpurhna an neih vek thu sawiin, inthiarfihlim lo a, a siamthatu ni theuh turin a sawm a ni.

Mamit District ah chuan Chapchar Kut hi Tennis Court, Mangkhawngdai ah hman a ni a, Kut pa DRDO Project Director Pu Malsawmzuala chuan Mizo hnam nunphung leh tawng chu chawi lar thar a pawimawh thu a sawi a ni.

Khawzawl District ah chuan Adviser to Chief Minister Pu H. Ginzalala'n Kut Pa niin a hmanpui a, Chapchar Kut chu induhsakna, inhmangaihna leh inthianthatna lantirna hun a nih angin Mizo history-ah a pawimawh em em a, inremna atan leh hun hlimawm taka hmanna hun a nih thu a sawi.

Saitual ah chuan Minister Pu B. Lalchhanzova chuan Kut Pa niin a hman pui a, Chapchar Kut thupui atana thlan “Zonun ze mawi- Inremna” tih chu a pawimawh hle a ni, a ti a, inremna tel lo chuan khawtlang a kal thei lo tih a sawi.

Hnahthial District ah chuan South Tuipui bialtu MLA, Pu Jeje Lalpekhlua chuan Kut pa niin a hmanpui a, Mizote chu Tlawmngai hnam, aia upa zah tu, mi harsa khaichhuak thin hnam annih thu sawiin chhunzawm zel turin kalkhawmte a sawm a ni.



## **SAITUAL DC**

Saitual Deputy Commissioner Pu Srinivas Sadi an nimina Saitual khelmuala Chapchar Kut lawmna-a Mizo tawnga thu a sawi chuan lawm a hlawh hle.

Saitual DC Srinivas Sadi hian minute 3 chuang thusawiin fiah felfai takin Mizo tawng vekin thu a sawi a, Srinivas Sadi hi Saitual DC ah kum 1 leh a chanve a awmna chiah a ni a, Saitual DC anih hma hian Aizawl DC office ah hna a lo chelh tawh a ni.

Saitual District-a Chapchar Kut lawmnaa “Kut Thlengtu’ Pu Srinivas Sadi chuan Mizoram a awm chhungin Mizo hnam ziarang leh nunphung hrang hrang a zir tih sawiin heng Mizo nun mawi tak a hmuh hi ropui a tih thu sawiin hmun dangah a hmuh ngailoh thu a sawi a, khawvel hmun dang anglo takin mahni aia midang ngaih pawimawhna tlawmngaihna nun an ngai pawimawh tlat tih sawiin hei hi ropui atih thu a sawi a ni.

Saitual DC chuan KTP General Conference Saituala neih ah tlangval pakhat chung a ‘Tlawmngaihna’ an lantir chuan a hneh hle a ti a, Mizorama mipui punkhawm lian ber thlengtu Saitual mipui tanrualna chu ropui atih thu sawiin an zinga tlangnel taka tel ve theia an siam avangin a lawm takzet tih a sawi a ni.



## **HOME MINISTER**

Nimin khan Home Minister Pu K. Sapdanga chuan Residential School, Lawngtlai, Sadbhav Mandal Chawnhu, Girls' Hostel, Lawngtlai leh Chawngte te chu a rualin Residential School, College Veng, Lawngtlai a hawng.

Pu K. Sapdanga chuan Lawngtlai District mipuite leh a mamawhtuten tangkai leh hlawk taka an hman tura Residential School, Lawngtlai, Sadbhav Mandal Chawnhu leh Girls' Hostel, Lawngtlai leh Chawngte te chu a hawn thu a sawi a. Hmasawna ruhrel tha tak tak hawnte tangkai tak hmang turin Lawngtlai mipuite a çhah a. Mizoram Sawrkarin LLADC kutah phal taka a pek thu tarlangin, a enkawl kawngah thahnem ngai taka thawk turin a chah a ni. Residential School chuan infiammite tan chona thar a pek ngei a beisei tih sawiin, eizawna tlaka hman a nih a beisei thu a tarlang a ni.

Khuallian chuan thalaiten tih takzet leh rualelna nei chung a ke an pen a hun tawh hle tih a sawi a. Mizoram tihmingthatu ni turin thalaite an pawimawh hle a, eng hna pawh thawk ila, rinawmna leh taihmakna nen neih fan fan a hun tawh hle nia ahriat thu a sawi. Chhim lam chu Mizoram kawtchhuah a ni tan mek tih tarlangin, hemi kawngah pawh lo inbuatsaih that a tul hle a, a bik takin Lawngtlai mipuiten tih tur an ngai hle a, theihtawp chhuah turin a fuih a ni. Ram leh hnamah chian a pawimawh hle tih tarlangin, hnam ziarang chawikan kawngah I harh thar ang u tiin a sawm a. LADC- ah sawrkar ngelnghet tak a awm a pawimawh hle a, chu chu mipuite duhdan pawh a ni tiin, chak taka LADC kal zel a beisei thu a sawi a, Mizoram sawrkar nen chak zawka thawk tlang zel turin duhsakna a hlan nghal bawk.

<><><>

## **MLA CUP 2026**

Home Minister Pu K. Sapdanga chuan nizan khan Lawngtlai DC Office kawtzawlah Lawngtlai East Constituency MLA Cup 2026 a hawng.

Home Minister Pu K. Sapdanga chuan Lawngtlai East Bialtu MLA leh Lawngtlai District Football Association (LDFA) te hmalakna fakawm a tih thu tarlangin, rah tha a chhuah ngei a beisei tih a sawi a. Lawngtlai thalaite chu ruihlo tlansana, taksa hrisel tura infiamna uar turin a fuih a. District piah lamah Mizoram leh India ram hmun dangah pawh hlawhtlinna an chang thei tih hriaa, beidawng lova thawk turin a chah a, Infiamite tan sawrkarin theihtawp a chhuah reng thu sawiin, hma alak zel tur thu a tarlang a. Lawngtlai thalaite infiamna uar deuh deuh tur leh Mizoram bakah India ram tihmingthatu ni turin duhsakna a hlan nghal bawk.

Khualzahawm Adviser to CM Dr. Lorrain Lalpeklina Chinzah chuan Football chu infiamna a nih liah lamah thiantha siamna, zirlai zirna pawimawh tak pakhat a ni a ti a. Field chhung leh pawna mizia leh hawiherah hawihawmna a pawimawh hle a, infiammite tan thinchhiat a rem lo tih sawiin MLA Cup chuan thalaite nunah nghawng tha a thlen ngei a beisei thu sawiin, team - tel zawng zawngte duhsakna a hlan nghal bawk a ni.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

## **PM IN ASSAM**

Prime Minister Narendra Modia chaun nimin khan Assamah hmasawna project cheng vaibelche sing 2 leh sang 4 chuang hu a hawng a, PM-KISAN Scheme dawngtu loneitu vaibelchhe sang 9 te hnenah installment vawi 22 na a pechhuak bawk. Guwahatia vantlang inkhawmah thu sawiin Pu Modia chaun NDA kaihhruai sawrkar chuan loneitute tan theihtawp a chhuah tih sawiin an sum lakluh ti pung tur leh agriculture sector te tunlai mila ti changkang zel turin tan an lak thu a sawi a. BJP kaihhruai Assam sawrkar chu hmarchhak state dangte tana entawntlak khawpin hna an thawk tha a ti bawk.

Vawiinah PM Modia hian Silchar a tlawh dawn a. Hmasawna hna thawh tur lungphum cheng vaibelchhe sing 2 sang 3 leh 550 hu lungphum a phum ang.

Prime Minister Narendra Modia chaun Bodo Area Development atan cheng vaibelchhe 1500 hman a ni ang tih a puang. Guwahati atanga Kokrajhar-a vantlang inkhawm te hnenah he thu hi sawiin Pu Modia chuan Bodo Territorial Council area hmasawna atan theihtawp an chhuah thu sawiin chak zawka hma a sawn theih nan cheng vaibelchhe 1500 hi hman rem tih anih thu a sawi a ni.

Pu Modia hi Kokrajhar tlawh tur ni mahse khua a chhiat avangin thulh a ni a. Guwahati atanga thusawiin Pu Modia chaun hun rei tak thisen chhuahna leh inthahna hmun ni thin Bodo area chu tunah chuan khawvel tharah chuangkaiin remna leh hmasawna a thleng mek a ti a. Thalai ralthuam keng sang chuangin an ralthuam tungin sawrkar kutah an inpek thu a sawi bawk a ni.

## **SDG**

Lok Sabha chuan Supplementary Demands for Grants- Second Batch 2025-26 a pawm. Sarwkar sum hman tur ruahman budget ami bak hman belh dilna hi cheng vaibelchhe nuai 2 leh sing 8 sang 1 a ni a. Sum hmann tur tam zawk hi leitha leinate, buh mantlawma leina leh ralthuam tihchangtlunna tur bakah thildang pawimawhte a ni a. Union Finance Minister Nirmala Sitharaman-i chuan Supplementary Demands hi grant 61 anih thu a sawi a . Heng hian ram eibar zawna kawngah chakna a pe ang tih a sawi.

<><><>